

Finalmein ina victoria per Schluein Glion

Cul niev trenader Corsin Cavegn alla lingua gudogna Schluein Glion per l'emprema ga quest atun. El campinadi da ballapei dalla 3. ligia ha Trun/Rabius schau negina schanza a Lumnezia.

HANS HUONDER/FMR

Avon in'jamna ha l'Unioni sportiva Schluein Glion reagau silla seria da prestaziuns mediocras dalla squadra dalla 2. ligia. Il trenader *Mate Lekishvili* ei vegnius remplazzau da *Corsin Cavegn*. Quei pass ha gia purtau in emprem success. El giug dalla sonda ha l'equipa dalla Foppa battiu St. Margrethen. Grazia a quei success cumplein – igl emprem quest atun e suenter siat rundas – dat segiramein motivaziun alla squadra pils davos quater giugs da quest atun. Ils dus proxims adversaris ein Winkeln e Montlingen, ils vischins ella tabella. En quella duas scuntradas vegn ei a semussar schebein Schluein Glion passenta igl unviern ella zona da relegaziun ni buca.

Negina schanza per Lumnezia

El derbi sursilvan da 3. ligia denter Trun/Rabius e Lumnezia ha ei dau in clar victur. L'equipa da casa ha dominau il giug naven dall'entschatta e gudignau cun 5:0. Lumnezia ha mai anflau il fil dil giug e surtut ellas empremas minutas ei l'equipa da *Giacun Vinzens* adina stada in pass memia plauna. Aschia sa Trun/Rabius semigliurar ella tabella sigl otgavel plaz, la differenza da puncts tiel quart – Valposchiavo – munta sulettamein in. L'equipa da Lumnezia decimada persunalmein spetga aschia vinavon sill'emprema victoria.

Terrada per Danis-Tavanasa

El campinadi dalla gruppa 1 dalla 4. ligia ei sulettamein ina dallas treis equipas sursilvanas stada en accziun. Danis-Tavanasa ha spiar cun 1:4 il giug ordeifer encunter Panaduz. Pana-



Savens ein ils giugadurs da Lumnezia (dretg) stai la dumengia in pass pli plauns ch'els giugadurs da Trun/Rabius.

FOTO HANS HUONDER

dus ei ussa secund ella tabella, tenor puncts spiar schizun megliers che Domat ch'ei alla testa. Plaun a plaun reiva era Schlarigna dalla tabella siadora suenter la victoria encunter Vaz-sut.

Dus remis en 5. ligia

Ils dus giugs dalla fin d'jamna ella gruppa 1 dalla 5. ligia ein i a fin omisdus cun in remis 1:1: Rueun encunter Tusaun-Cazas e Trun/Rabius encunter Union Trin. Tuttas quater equipas mantegnan aschia il contact culla testa dalla ta-

bella. La differenza da puncts denter ils sis emprems dalla tabella ei pintga.

Juniors B battan Cuera 97

In bi success han ils juniors B dalla Surselva festivau ordeifer encunter Cuera 97. El giug dalla Youth League B – la pli aulta ligia dils juniors dalla Svizra orientala – ha la squadra battiu l'equipa dalla capitala cun 3:2. Grazia a quei success cumplein ein ils Sursilvans ussa classai meglier che Cuera 97 ella tabella ed aschia la megliera equipa grischuna en quella ligia.

TIR

Per la fin da la stagiun buns resultats

GION NUTEGN STGIER/FMR

Buns resultats dals matscheurs grischuns al tir final a Cuira malgrà il ferm vent e las temperaturas plitost bassas. Ina surpraisa ha chaschunà *Guido Cramer* en la concurrenza cun la pistola cun er batter il grond favorit *Elmar Fallet*.

La stagiun da tir 2021 da las distanzas da 300 meters e 25/50 meters è ida a fin cun il tir final al stand da sajettar Rossboden a Cuira. Ina giada dapli ha il vent procurà che las relaziuns èn stadas difficilas. Vitiers è vegni che la glisch era plitost viva ed inquieta. Tuttina han ils matscheurs grischuns persvas cun sajettar resultats respectabels. Ina bilantscha positiva da la stagiun da tir dals matscheurs dal Grischun fa er

Hubert Tomaschett, il schef da las gruppas da matscheurs da la Federaziun Grischuna dal Sport da Tir. Sin champ naziunal hajan ils matscheurs grischuns obtegnì buns resultats, en spezial tar la Festa da tir federala a Lucerna, ha punctuà Tomaschett.

Dad onn tar onn pli ferm

Ina giada dapli ha *Gregor Maurer* (Favugn) gudagnà la concurrenza arma da sport dus posiziuns. Il matscheur ha fatg 583 puncts, in fitg bun resultat. Plaz dus è i a *Remo Capeder* (Duvin), el che vegn dad onn tar onn pli ferm cun l'arma da standard ed è in gudogn per la gruppa dals matscheurs. Sajettà ha el sonda passada a Cuira 576 puncts. Cumplettà il podest ha *Otto*

Bass (Sumvitg) grazia a ses 571 puncts. *Carl Frischknecht* (Tumegl) è il victur en la concurrenza arma da militar dus posiziuns. Fatg ha il victur 529 puncts. Segund è vegni *Hanspeter Lötscher* (Tavau) e terz *Peter Jemmy* (Castrisch). Cun l'arma da standard en la concurrenza en venter hai dà ina traidubla victoria per ils tiradurs *Michael, Roger e Meinrad Monsch* (Zebras). En la medema concurrenza cun l'arma d'ordonanza sa numna il victur *Urs Nauli* (Tumegl). Ina vaira surpraisa è lura la victoria da *Guido Cramer* (Li Curt) tar il tir da pistola sin la distanza da 50 meters. Il victur ha sajettà 567 puncts e fatg uschia trais, respectivamain quater puncts dapli che *Roman Clavadetscher* ed il grond favorit *Elmar Fallet*, omadus da la Val Müstair.



Han era tratg en schanuglias. (da san.) Marcus Flury e Remo Capeder.

FOTO GION NUTEGN STGIER

SCHLUEIN GLION – ST. MARGRETHEN

Emprema victoria per Schluein Glion

El siatavel giug da campinadi ha ei dau l'emprema victoria per Schluein Glion. Suenter la midada sil post da trenader ha l'equipa mussau ina prestaziun engaschada e ha meritau quella victoria. Las midadas tactics dil niev trenader *Corsin Cavegn* han purtau fretg.

Naven dalla bial'entschatta ha Schluein Glion priu il giug enta maun e ha giugau spert ed offensiv ord ina defensiuun stabila. Quei ei vegniu remunerau gia ella 5. min.. *Tiziano Vinzens* ha surpriu la balla cuort avon la lingua da sedisch e ha cun in siet sorprendent e precis el cantun ault sittau igl 1:0. Silsuenter ei il giug s'ulivau, las meglieras caschuns da marcar han denton vinavon ils indigens giu. Ton *Ronny Della Morte* sco era *Tiziano Vinzens* han denton munchentau fetg bunas caschuns. Cuort avon la pausa eis ei lu vegniu ualti dramatic a Crap Gries: Igl emprem ha *Flurin Capaul* impediù cun ina stupenta parada l'egalizaziun entras in siet naven dil punct da penalti ed ella cunterattacca ha aunc inagada *Tiziano Vinzens* buca dumignau da sittar il 2:0 era sch'el ha saviu cuorer naven da miez il plaz persuls encunter gol. Siu siet ha il goli frenau bravurusamein. Mo ina minuta pli tard ha quei goli sittau la balla sut pressiuun exactamein ad *Andri Michel* els peis. Lez ha buca schau suppli-car e ha alzau la balla naven da miez dil plaz sur il goli ora al 2:0.

Egl emprem quart ura suenter pausa ha l'equipa da casa buca saviu mussar la medema prestaziun sco ell'emprema mesadad. Ils hosps han nezegiau quei temps da fleivlezia dils indigens per egalisar il giug. *Rilind Shala* ha nezegiau ina malcapientscha suenter ina remessa laterala per sittar il 2:1 e *Nurkan Ibrahim* ha sittau il 2:2, cun realisar il secund penalti ch'igl arbitradur ha schulau per St. Margrethen. Tier quei resultat eis ei restau entochen cuort avon la fin. Ils giugadurs da Schluein Glion han denton encuretge entochen alla fin il gol dalla victoria. Quei ei vegniu remunerau. *Aron Büchler* ha sittau ella 90. min. ina flanca liunga naven dalla vart seniastra ella zona da puniziun, leu ha Gian Sgier deviau la balla cun tgau a *Serafin Bundi*, il qual ha tuschau ella sur lingua al 3:2.

Beat Dermont

2. ligia regionala, gruppa 1

Schluein Glion – St. Margrethen 3:2 (2:0)

Crap Gries. – 170 aspectaturs. – Arbitr: Aliji.

Gols: 5. Vinzens 1:0, 45. Michel 2:0, 49. Shala 2:1, 60. Nurkan Ibrahim 2:2 (penalti), 90. Bundi 3:2.

Schluein Glion: Capaul; Dermont, Matthias Derungs, Livio Derungs, Büchler; Sgier, Michel, D'Atria (76. Gallmann), Bundi; Della Morte (46. Tschalèr), Vinzens (80. Gomes Machado).

St. Margrethen: Cavalcanti; Künzler, Rexhepi, Forgia, Bykov; Shoshi (16. Braun, 46. Isuf Ibrahim), Cetinkaya, Shala, Aliu; Maliqi, Aktas (57. Nurkan Ibrahim, 73. Gavranic).

Remarcas: Cartas melnas: 16. Matthias Derungs (foul), 40. Aktas (foul), 75. Maliqi (foul), 84. Gavranic (foul) e 85. Bykov (foul). – Corners: 0:7. – 43. Capaul tegn penalti sittaus da Maliqi.

TRUN/RABIUS - LUMNEZIA

Clara victoria per Trun/Rabius el derbi

Da bellezi'aura d'atun ed avon ina grondiusa culissa d'aspectaturs a Pustget surpren Trun/Rabius immediat la bitgetta el derbi sursilvan encunter Lumnezia e va gia suenter gnanc duas minutas en avantatg entras *Patrizio Decurtins*. Il proxim gol lai buc spitgar ditg; *Gianin Derungs* vegn lantschus cun in bi pass liung da Sandro Orlik e setta il 2:0 per l'equipa da casa. Gnanc duas minutas pli tard il proxim gol: *Clau Berther* semetta atras ed alza il resultat sin 3:0 cun in ferm e plazzau siet. Puh, uss stuein nus trer flad inaga. Igl ei pia gnanc giugau 15 minutas e gia meina Trun/Rabius 3:0 el derbi. Ideala entschatta per l'equipa dalla Cadi ed ina pulita frida pils Lumnezians. Il CB T/R reducescha ussa empau il tempo, controllescha denton vinavon la partida e va ella 37. minuta schizun cun 4:0 en avantatg entras *Damian Schmed*.

Da pausa dat ei pia dabia da discussiunar pils numerus aspectaturs. Suenter il te croda il nivel dalla partida. Trun/Rabius sto buc pli e Lumnezia ha miserias da vegnir tier dapli. La megliera schanza pils Lumnezians sedat entras in culp liber da *Matias Alig* che *Mauricio Cathomas* parescha denton. Ed aschia eis ei plitost in spitgar tochen che l'ura muossa 90 minutas. Cuort avon la fin tuttina aunc in ulteriur gol pil CB T/R: *Patrizio Decurtins* setta siu secund gol da quei di aschia ch'el resultat final munta 5:0. Trun/Rabius gudogna pia clar il derbi sursilvan grazia a cunzun ina ferma prestaziun ell'emprema mesadad. (cdm/fmr)

3. ligia, gruppa 1

Trun/Rabius - Lumnezia 5:0 (4:0)

Pustget, Trun. – 310 aspectaturs.

Gols: 2. Patrizio Decurtins 1:0, 11. Gianin Derungs 2:0, 13. Clau Berther 3:0, 37. Damian Schmed 4:0, 85. Patrizio Decurtins 5:0.

Trun/Rabius: Mauricio Cathomas; Damian Schmed, Livio Janka, Ramon Orlik, Sandro Orlik; Daniel Pfister (60. Remo Alig), Mathias Flepp (62. Denis Monn), Salvatore Stagliano, Clau Berther (75. Silvan Muoth); Patrizio Decurtins, Gianin Derungs (71. Fabio Caduff).

Lumnezia: Martin Mark; Danilo Blumenthal, Tizian Casanova, Manuel Casanova, Mauro Cadonau; Matias Alig, Pascal Marc Derungs, Andriu Alig, Gion Alig, Dario Capaul; Dino Blumenthal.

Remarcas: Trun/Rabius senza Beat Cadruvi, Orlando Monn e Mirco Pfister.